

Mientras peticionnan pa retiro ta sigui drenta **DESEMPLEO ALCANZANDO 40 PORCIENTO**

Segun mayoria di
politiconan di Comision di
Independencia

DIARIO
DI ARUBA Bo Matutino
Netamente Arubiano

BERDAD NUNCA A PER-
JUDICA NINGUN HENDE
NINGUN CAUSA NI NIN-
GUN NACION

DIARANZON 17 APRIL 1985 ANA 4, No. 1297

FECHA DI STATUS APARTE MESTER APARECE DEN LEY PA CAMBIO DI STATUUT

ORANJESTAD(AAN)—E fecha di Status Aparte mester aparece den e Ley di Reino cu ta regla e cambio di Statuut y no por aparece solamente den e nota aclaratorio, manera ta e caso den e concepto cu a wordo manda pa Aruba y Antillas. Esey ta e punto di vista cu a keda expresa pa mayoria di politiconan durante e reunion di Comision di Independencia cu a tuma lugar ayera.

Ministro Hulandes pa Asuntunan Antillano a haya e mensaje pa medio di un telex cu a wordo manda pa e Presidente di e Comision, señor Betico Croes.

Den e telex un vista ta wordo duna di e diferente puntonan di vista di e fraccionnan den Parlamento di Aruba, tambe representa den Comision di Independencia di Aruba.

E concepto di ley a duna base pa e fraccion di MEP recomienda pa ademas di e fecha di Independencia, menciona tambe den e ley, cu mester tene un conferencia manera acorda na Mesa Redonda pa evalua e momento cu Aruba lo haya su independencia. Ademas pues MEP ta haya cu Statuut mester cambia entrante Promer di Januari 1986 y cu esaki mester ta estableci pa e ley, cu tambe mester contene algun stipulacionnan pa eleccionnan promer cu dia 1 di Januari 1986, tambe si pa introduccion di e Staatsregeling y aprobacion di e concepto di ley di Reino pa cambia Statuut, un mayoria di dos tercera parti di Parlamento Insular wordo alcanza.

E fraccion di AVP tambe a haya cu e conferencia di evaluacion promer cu Independencia mester wordo inclui den e ley, mientras cu AVP ta boga pa promer cu e conferencia Pueblo wordo consulta, esta un referendum wordo teni. AVP tambe kier pa e fecha di Status Aparte keda estableci den e ley directamente, mientras cu e asunto di eleccion promer cu Status Aparte tambe mester wordo regla.

E opinion expresa y transmiti pa PPA tabata poco mas largo pero en esencia ta emcarga algun punto. Asina a ser puntra cu si e inicio di e dos leyman a wordo redacta den totalidad manera dicidi na Mesa Redonda, haciendo referencia na e hecho cu lo mester inclui "como fase transitorio pa Independencia di Aruba".

Pa loke ta e hecho cu fecha di independencia no ta wordo menciona den e ley, PPA a bisa cu ariba su mes esaki no ta un problema, comoquiera cu e partido semper a considera Promer di Januari 1986 como un "streefdatum", esta un fecha desea. Pero si a mostra ariba e hecho cu e fase transitorio mester cubri un periodo di diez aña. PPA a recomenda pa cambia e frase pa e bira cu Independencia di Aruba ta keda introduci diez aña despues di inicio di Status Aparte. Tambe PPA ta haya cu mester regla e asunto di eleccion pa un Colegio di Staten di Aruba oficialmente den e ley.

PPA tambe ta haya cu e eleccion mester tuma lugar promer cu inicio di Status Aparte di Aruba.

E Independentenan Kelly y Spanner a bay di acuerdo cu e puntonan di vista di AVP y MEP, bisando cu nan ta duna hopi importancia na e referendum y e conferencia di evaluacion. Adria de Palm a bay di acuerdo cu e punto di vista di MEP.

E Presidente di Comision di Independencia ta bisa cu gustosamente Comision di Independencia lo duna mas informacion encunto e puntonan di vista expresa, durante tratamiento di e Ley den Parlamento Hulandes.

INICIO RENOVACION ARUBA CARIBBEAN HOTEL



"No ta remarcable cu mester menciona cu atrobe turismo mester trece alivia ariba tereno di desempleo, awor cu e refineria petroleiro a cera su portanan? Mas remarcable ta e hecho cu awe atrobe cu e proyecto di Aruba Caribbean Hotel ta habri un era nobo, esta cu por lo pronto nos mester biba cu un cultura monofacetico den economia, cu turismo como unico pilar importante". Esaki tabata parti di e discurso di señor Betico Croes ayera na momento cu desvelo di un borchí a significa cu trabaonan pa restauracion di Aruba Caribbean Hotel lo cuminsa oficialmente. Mas encunto e-saki den edicion di awe.